

## **Schwäbisch schreiben? Mundart-Gedichte? Aber ja!**

### **D Muschl**

I heb se no manchmol ans Ohr.  
Doch, do stand i dr zua.  
Was, do drfür sei i doch z alt?  
Wieso?  
Dia Muschl isch wahrscheinlich  
viel ältr als i.

Worom soll i mir des net gönna?  
Hosch du nia a Sehnsucht  
noch ebbes Verlorenem,  
noch ebbes, des de vermischt?

Nach amma Ort,  
den da mol kennt hoschd?  
Odr noch Menscha,  
dias nemme geit?

Jetzt nemm halt  
a große Muschl  
ond halt se an d Ohra,  
wia i, mit meim Meer.

Muaschd halt  
d Auga zuamacha,  
ond horcha,  
ond dr Zeit lassa.

Hörschs?  
Siescht, wias hochsteigt,  
des Rauscha  
ond dia Wella ond dr Sand.

Ond der Hemml  
isch so gnadelos blau.  
Ond wie s dir warm wird  
ondr deinr Muschl am Ohr.

Zletscht seh i no d Oma,  
wia dia mir dia Muschl schenkt.  
Des war jetzt ganz superschee.  
Probier s halt au amol.

Ja so, jo,  
wenn da koine Sehnsüchte hoschd,  
no brauschk natürlich au koi Muschl.  
Was, Zeit hoschd au koine?  
Jo dann,  
schad für di.